

Noticia
Transparente
di Gobierno

ISLA ONLINE

Dialuna 11 November 2024

Email: IslaOnline@gobierno.aw Tel: 528-4952

ARTE DI MURAYA
SAN NICOLAS



Gabinete Wever-Croes



PROME MINISTER

Evelyn Wever-Croes

Nicole Hoevertsz ta pone bandera di Aruba den bista di henter mundo SECRETARIA GENERAL DI COA Y VICE PRESIDENTE DI IOC A REUNI CU PROME MINISTER



Diabierna mainta 8 di november Prome Minister Evelyn Wever-Croes a reuni cu Secretaria General di Comité Olimpico Arubano señora Nicole Hoevertsz.

Desde aña 2021 Nicole tambe ta e Vice-Presidente di e organo mas halto di e deporte mundial esta Comité Olimpico Internacional (IOC) y Presidente di e comision di coordinacion pa e Weganan Olimpico di LA2028. Durante e reunion, Nicole a duna Prome Minister un actualisacion pa locual ta trata su trabou den Comité Olimpico Internacional, IOC.

Prome Minister y Aruba ta hopi orguyoso di e rol cu Nicole ta desplega, poniendo Aruba riba mapa internacional. Aparte di esey Nicole tambe ta dedica tempo inspirando y formando hobennan den area di deporte, inculcando e importancia di

norma, balornan y disciplina den deporte. Recientemente, Nicole a ricibi e Condecoracion Real, como Officier in de Orde van Oranje-Nassau pa e añanan di dedicacion na deporte, na nivel nacional y internacional. Nicole a dedica henter su bida na deporte paso e ta convenci cu esey ta e cos di mas bunita y mas importante pa crea un mihor mundo y un mihor pais.

“Cu e dedicacion di Nicole y e talento di e atletanan Arubiano, den futuro Aruba por tin su prome medaya Olimpico. A trata di un combersacion ameno y hopi prometedor pa futuro olimpico di Aruba. Aruba ta un isla chikito y Nicole a resalta e nomber di Aruba internacionalmente. Danki Nicole, Aruba ta orguyoso di bo. Danki pa pone nos bandera den bista di henter mundo”, Prome Minister a expresa.

Prome Minister Evelyn Wever-Croes:

ARUBA TAWATA ANFITRION DI “HET NATIONAAL ONDERWIJS CONGRES CARIBBEAN”



Diamars dia 5 di november a tuma luga na Aruba “Het Nationaal Onderwijs Congres Caribbean”. Hunto cu e comite di Hulanda a organisa e merdia na Colegio Arubano pa docentenan di Aruba.

Prome Minister Evelyn Wever-Croes tawata presente pa e congreso unda el a bishita algun klas y mira kico ta atendiendo cu ne. E congreso ta trata di charlanan di motivacion y tayernan orienta riba practica, cu un programa varia y educativo. Durante e congreso, docentenan por a intercambia di idea hunto cu oradornan riba e ultimo tendencianan, desaroyonan, innovacion y productonan mas nobo den enseñansa. A dialoga tambe riba situacionnan cu ta biba bou mucha- y hobennan cu por afecta nan na scol y con pa maneha esaki na e miho manera.



“Por a mira e interes grandi cerca e docentenan. Ta cu e interes y pasion cu e docenten tin pa nan trabou so por traha na mehora e educacion di nos mucha- y hobennan, y pa esaki mi ta gradici nan di curason. Danki na Colegio Arubano pa a adecua e scol pa asina e congreso tawata un exito rotundo. Tawata un momento di nostalgia pero semper bunita pa ta bek na e e scol cu mi a atende den mi hubentud. Pabien na tur esnan cu a haci e “Nationaal Onderwijs Congres Caribbean” na Aruba un exito”. Prome Minister a expresa.

Prome Minister Evelyn Wever-Croes:

DEN CURASON DI SANTA CRUZ A DESVELA BORCHI DI CAYA NA HONOR DI HYACINTHO RUDOLFO (RUDY) CROES

Rudy tawata hopi stima den Santa Cruz y un gran gobernante cu logronan grandi riba su nomber pa pais Aruba



Diabierna 08 di november a tuma luga e ceremonia unda a desvela e borch di e caya na honor di Hyacintho Rudolfo (Rudy) Croes. E caya ta cuminsa na rotonde di Plaza Status Aparte te na rotonde di ex-Drive inn. Prome Minister Evelyn Wever-Croes tawata presente pa e ocasion importante aki hunto cu coleganan minister y varios parlamentario y colega di Partido MEP. Rudy Croes a nace 5 di september 1946 y a fayece na edad di 75 aña dia 20 di november 2021. Den su carera politico Rudy a sirbi pais Aruba como Parlamentario y Minister.

Rudy Croes tawata un gran persona y hopi stima den Santa Cruz. E tawata un gran politico y un gran gobernante cu logronan grandi riba su nomber pa pais Aruba. Aparte di esey Rudy tawata integrante di e famoso Grupo di Betico y a eherce trabounan social, caricativo, y tawata activo den diferente area di deporte. Tambe den su tempo liber Rudy tawata activo den e "Harley Davidson Riders Club".

Prome Minister a splica riba e procedura di e peticion pa dedica un caya na un persona cu ta a base di un lista di cierto cantidad di firma di habitantenan di e caya unda ta mostra cu nan ta di acuerdo cu e cambio di e nomber. E peticion tambe ta contene un descripcion di logronan di e persona, no solamente pa loke ta trata su trabou, pero tambe logronan pa pais Aruba. A base di esey, e peticion lo wordo tuma na consideracion.



"Esaki ta djis un parti chikito di e biografia di Rudy. Awe ta asina leu cu Gobierno ta dedica e caya aki na Rudy Croes. Tawata un anochi agradabel unda su yiunan, rumannan, famianan y coleganan di Partido Movimiento Electoral di Pueblo a reuni pa e momento memorabel y a recorda logronan grandi di Rudy. Santa Cruz y Aruba ta dedica e caya aki na e gran persona Rudy Croes. Danki Rudy, pa tur loke bo a haci pa nos dushi isla Aruba", Prome Minister a expresa.





MINISTER MADURO DI FINANSA A DUNA COMISION FINANCIERO DI PARLAMENTO UN BISTA CRONOLOGICO DI E TRABOUNAN HACI PA STABILISA Y MEHORA FINANSA PUBLICO NA ARUBA



Recientemente Minister Xiomara Maduro di Finansa a brinda un update financiero na e Comision Financiero di Parlamento. Pa e ocasion aki Minister Maduro a brinda un bista cronologico di tur e trabounan cu a wordo haci pa stabilisa y mehora e finansa publico di Aruba, pa asina por crea espacio fiscal pa por reduci debe di Aruba y haci inversion necesario.

Un rumbo financiero nobo den 2018

E mandatario a splica cu desde aña 2018 Gobierno a fiha un rumbo financiero nobo pa Aruba den cual Gobierno a keda den e marco financiero cu Parlamento a autorisa den presupuesto y no bin pidi placa extra den presupuesto supletorio. Na mes momento na aña 2018 Gobierno a traha e Memorandum Financiero y Economico FEM den cual a stipula e caminda pa

cana pa yega na surplus pa asina por baha e debe di Aruba y haya fondo disponibel pa haci inversionnan necesario. Cu e FEM como base Aruba ta cera un Protocol cu Hulanda cu ta fiha e normanan financiero pa e proximo añanan.

Ta para e crecimiento di debe den 2019

Den aña 2019 Gobierno a cuminsa introduci un reforma fiscal cu tabata planea pa bay den 4 fase. Na mes momento Gobierno a controla e crecimiento di debe y a trece un balanse entre presta local y riba mercado internacional. Di e manera aki ta cuminsa baha e presion di e interesnan di debenan externo. Door di e cambionan aki ta logra cu na final di aña 2019 Aruba ta yega cerca di un presupuesto balansa rumbo pa un surplus.

Continuacion MINISTER MADURO DI FINANSA A DUNA COMISION....

Den añanan di pandemia ta purba contene gasto y prepara reforma

Den añanan di pandemia 2020 y 2021 Gobierno a purba mas cu por pa keda tene na e normanan financiero pa no mester a presta mas placa cu ta necesario for di Hulanda. E fiansanan tabata necesario pa tene e fondonan social di SVB y AZV intacto y pa por brinda yudansa y alivio fiscal na comunidad pa evita un colapso di economia y deterioro social a consecuencia di e daño cu e pandemia a haci na economia y finansa di Aruba. Na november 2020 Aruba y Hulanda ta yega na acuerdo den Landspakket pa cuminsa haci reformanan necesario pa haci Aruba mas fuerte y resiliente contra desastrenan manera pandemia. Pa mehora finansa publico, Gobierno a cuminsa traha di biaha riba tena A maneho financiero, tema B Gasto y eficiencia di e aparato publico, y tema C reforma fiscal.

Den 2022 ta bolbe trece balansa entre entrada y gasto

Den aña 2022 economia di Aruba ta bolbe florece y Gobierno a cuminsa prepara pa trece balansa entre entrada y gasto di gobernacion pa asina habri caminda pa por yega na presupuestonon cu surplus den 2023 bay dilanti. E surplus aki ta necesario ya cu Gobierno mester crea espacio fiscal pa por reduci e debe y pa por haci inversion necesario.

Disciplina financiero ta duna fruta den 2023

Den 2023 tin hopi mehoracion positivo debi na e disciplina financiero cu Gobierno a bin ta tene su mes na dje. Ta entrega presupuesto na tempo despues di 15 aña cu esaki no tabata na tempo. Presupuesto 2023 ta e prome presupuesto cu ta conta cu un surplus despues cu nos Pais a bin ta conoce solamente deficitnan. E presupuesto 2023 ta conta cu un surplus mas halto cu 1% di nos GDP, y ta cumpli asina cu e norma financiero di e Ley di supervision financiero LAFT. Den 2023 tambe a cuminsa traha cu un Nota di Comienso di Aña (Voorjaarsnota) den cual Parlamento na un manera hopi tempran den aña ta haya un bista di e ehecucion y cambio den maneho di Gobierno den presupuesto. Di e manera aki ta fortifica e ‘budgetrecht’ di Parlamento. Na comienso di 2023 ta introduci cambionan fiscal.

A prepara dos aña largo pa introduci un BTW, pero debi cu e partner den coalicion a hala atras na ultimo momento, Gobierno ta introduci BBO na frontera cu den cierto forma ta funciona manera un BTW. Den 2023 Gobierno a sigui traha riba mehoracion financiero, y

ta ekipa Departamento di Finansa y Departamento di Impuesto pa por elimina retraso y capacita e personal cu yudansa di training di CARTAC cu ta IMF su partner Caribense pa brinda asistencia tecnico. Banda di esaki Gobierno a traha riba e leynan necesario pa maneho di material (materieel beheer) y sistema di raportahe financiero (verslaggevingsstelsel) manera poni den tema A di Landspakket. Den 2023 pa prome biaha Gobierno ta aplica e maneho di meevaller y di e manera aki ta destina e extra fondo di surplus pa paga debe y pa haci inversion necesario.

Na fin di 2023 Aruba ta ancora normanan nobo di supervision financiero den e Ley di supervision financiero LAFT, un surplus di 1% di “dept to gdp”, gasto di personal bou 10% di gdp y e debe cu lo mester ta na 50% “debt to gdp” na aña 2040. Ta normanan cu ta bay conta pa presupuesto 2024 en adelanta.

Ta logra crece credibilidad financiero di Aruba

Un punto importante den aña 2024 ta e hecho cu Gobierno basa riba e recuperacion impresionante di Aruba y e seriedad demostra pa tuma desicionnan necesario, ta logra crece e credibilidad financiero di Aruba. Esaki ta keda refleha den raportnan positivo di dos compania di rating, Standard and Poor’s y Moodys cu ta duna Aruba un investment rating mandando e señal na inversionista y turista cu Aruba ta un pais na unda nan inversion ta sigura. Banda di esaki Gobierno a bolbe presenta den aña 2024 un presupuesto cu surplus y na e momentonan aki caba a presenta un presupuesto cu surplus tambe pa aña 2025. Muestra cu Gobierno di Aruba ta traha cu e seriedad debido cu ta inspira confiansa y ta crece e credibilidad financiero di Aruba.

SINTONISA

CONFERENCIA DI PRENSA
DI GOBIERNO DI ARUBA

Gabinete Wever-Croes

DIALUNA Y DIAHUEBS | 10:00 AM



MINISTER

Geoffrey Wever

MINISTER GEOFFREY WEVER CU PRESENTACION EDUCATIVO NA FATIMA COLLEGE OVER SDG'S Y E IMPORTANCIA DI SPAAR



Tur siman Minister Geoffrey Wever ta bishita diferente scol basico pa asina duna alumnonan di 6e klas informacion tocante e metanan di desaroyo sostenibel (Sustainable Development Goals (SDG's)). E proyecto aki a inicia desde october aña pasa y Minister Wever bishita mas di 25 scol basico caba. Meta di e proyecto aki ta pa conscientisa nos hobennan di e importancia di desaroyo sostenibel y con nan mes por aporta na un desaroyo sostenibel. E siman cu a pasa a toca turno na Fatima College.

Na cada di e presentacionnan aki Minister Geoffrey Wever ta splica e alumnonan cu tur e 17 SDG's ta conecta cu otro. Asina aki hunto cu e alumnonan ta intercambia ideanan over, entre otro, e importancia di enseñansa di calidad (SDG #4) y trabou decente (SDG #8) pa elimina pobreza (SDG #1), e importancia di energia limpi y economico (SDG #7) y accion riba clima (SDG #13) pa un desaroyo sostenibel y reduccion di desigualdad (SDG #10).

Den cuadro di educacion financiero y inclusion financiero – cual ta contribui na un sociedad mas sostenibel y inclusivo - Minister Geoffrey Wever a desaroya e programa 'National Children Savings Program' pa stimula spaar na un edad jong y asina logra pa futuro un generacion cu ta spaar. Door di promove inclusion financiero y provee acceso na oportunidadnan pa



spaar pa tur mucha, nos por reduci desigualdad economico. Esaki ta sigura cu tur hende tin un oportunidad husto pa construi un futuro financiero sigur. Minister Geoffrey Wever a splica e muchanan con spaar for di un edad jong ta aporta na diferente SDGs.

Como parti di e ehecucion di e 'National Children Savings Program' a start un campaña di conscientisacion di e importancia di spaar cerca nos hobennan for di un edad jong, y riba e rol importante cu e famia tin den esaki. E campaña di conscientisacion aki yama 'BIG DREAMS, Small Steps', unda ta duna hobennan y nan famia tips con pa spaar. Pa alumnonan di 6e klas di scol basico lo tin un competencia unda por gana un premio di Afl. 250,-. Lo saca 3 ganador.

E competencia ta encera pa skirbi un carta over bo metanan di spaar y bo plan di spaar. Ultimo dia pa manda e carta pa por participa ta 15 november 2024 na info.minezcdo@gobierno.aw. Tambe por subi e pagina di internet www.deaci.aw/BIGDREAMS unda por haya e formulario.

"Mi kier a gradici cabesante, docentenan y alumnonan di O.L.V. Fatima College pa a ricibi nos. Danki - Minister Geoffrey Wever.

Gabinete di Aruba:

BUNITA MERDIA DI BINGO PA NOS GRANDINAN



Gabinete di Aruba a organisa un merdia di Bingo pa pensionadonan Arubiano na Hulanda.

Na e ocasion aki directora di Gabinete di Aruba Joselin Croes LL.M/M.Sc a bisa di ta contento cu un grupo di nos grandinan a participa na e merdia aki. 'Pa nos ta importante pa di e manera aki keda den contacto cu nos pensionadonan y tambe unda por organisa actividad pa nan. Por ultimo Joselin a gradici tur personan cu a haci e merdia aki posibel, specialmente e funcionarionan di e departamento di Bienester General, Enseñansa y Cultura di Gabinete di Aruba.

E tabata un merdia hopi ameno y hopi ganador a bai cas cu bunita premio.





Gabinete Wever-Croes

Murayanan na San Nicolas, cu un tempo tawata silencioso y senciyo, a bira inspiracion pa creatividad dinamico di varios artista. Cada arte di muraya ta un celebracion di diversidad, cultura y union, dunando bida na murayanan y transforma nan den obranan maestro.

2024

AÑA DI STABILIDAD Y PROSPERIDAD